

四庫全書

集部

欽定四庫全書

集部

文簡集卷

四至六

詳校官中書_臣葉元符

中書_臣劉源溥覆勘

欽定四庫全書

文簡集卷四

明 孫承恩 撰

表

賀萬壽表

天地儲祥啟億萬年之鴻祚聖神際世應五百載之昌期
仰飛龍之在天覩流虹之降渚乾坤動色日月增華
恭惟我皇上德合希夷道通元始握寶符而凝命躬景

運以宅中天心格而風雨時懋致中和之極治化昭而
禎祥出正維熙皞之辰闡玄化允契乎三靈膺鴻號獨
超乎千古監觀有赫眷佑彌昌歲事屢登黎庶遂倉箱
之願皇威遠暢邊陲息桴鼓之聲建皇極以表萬方播
洪鈞而陶庶品嘉此仲秋之屆候實維上聖之誕生萬
寶相將告成二儀以之交泰水朝宗而星拱極萃五服
之冠裳岳効竒而川獻珍來百福之孚佑溢歡聲於率
土霽瑞氣於層霄即真宰之洪庥徵大君之遐福臣等

叨塵侍從濫被恩私擬金鑑於唐臣疎庸竊愧瞻龍光
於堯陛欣忭實深伏願保合太和茂綏純嘏天長地久
絲帝壽於無疆聖子神孫莫皇圖於不拔臣無任云云

又賀萬壽表

伏以道隆皇極衍五福於箕疇慶洽明時侈曠儀於王
會同羣心以傾日祝遐筭以齊天海岳發祥聖神應運
臣等誠懼誠忭稽首頓首稱賀者恭惟皇帝陛下英明
天啟敬德日新誠格上玄雨暘燠寒時若仁漸下土山

川鬼神畢寧欽承列聖鴻圖懋行萬年寶厯遜志配殷
宗之時敏單心並成后之緝熙凡與生成曷勝慶戴嘉
此仲秋之月載逢降聖之期日月貞明乾坤清謐金莖
露渥仰承霄漢清華紫蓋雲屯遙見函關異氣白鹿呦
鳴於靈囿嘉禾合穎於周郊靈液流甘慶澤自天潢而
益遠神龜呈瑞珍圖應河洛以同符協氣從清風並翔
歡聲與天籟共暢載新慶典誕展彝章望黃屋於雲中
拱翠華於天上樂成九奏想鳴鳳以來儀班合兩階紛

獻雉於重譯祗承陛唱競効嵩呼仰一德之懋昭來百
神之孚佑臣等幸逢熙運叨列清班寅奉宸居敬歌天
保樂造化生成之德誠莫罄夫揄揚極臣子忠愛之忱
但益勤夫頌禱伏願寶唐臣之金鑑恒日就而月將邁
周室之歷年同天長而地久臣無任

云云

賀冬至表

伏以黃鍾應律式占天地之心紫極迎祥茂際貞元之
會禮隆亞歲運協昌辰恭惟皇上先天不違與神合契

功高萬化德洽九圍喜諸福之備臻信重玄之默佑嘉
禾產於帝藉瑞鹿貢自親藩郊廟鼎新天地祖宗昭格
雄藩率服農工商賈謳歌方隆滋至之休益荷復來之
慶時當子之半日如度以方中運啟午之元雪應期而
已降斯誠天眷明德又將錫以豐年是以凡厥庶民用
咸協於皇極大明之治斯其盛矣中興之烈無能名焉
臣等職忝清班躬逢長慶同萬方而獻履率百辟以迎
祥觀六宮之飛灰是竊感時思報誇五紋之添線每因

撫事興懷道隨陽長而臨而泰六合迓王王之春德與日新乃聖乃神九重介萬萬之壽本支蕃衍宗社奠安

臣無任

云云

賀正旦表

伏以斗轉青陽寶曆應三元而首祚春回玉律黃鍾含萬象以宣和乾坤會交泰之期日月啟光輝之旦璇衡改度鼓陽氣以被八區莫莢舒祥順時和以先庶彙三陽肇長九宇咸亨仰惟皇上德合上元道通太始文明

協極保至治於無為剛健體元運神功於不顯自天之
佑如日之升王道順而泰階平賴一人之有慶陽德亨
而善類長知庶績之咸凝矧茲元會之辰大集亨嘉之
祉條風拂曙祥光聯玉仗於中霄葭律司春瑞氣曜青
旂於東序歷開二紀萬方占帝德之昌化洽重華九葉
建皇圖之永時臨正始慶協履端臣等職忝清班躬逢
嘉會荷乾元之大造俯遂生成際陽德之方中仰祈豫
大伏願體天弘化敘五福以錫民承乾偕行撫三辰而

宰物聖功時叙大敷六合之春景運日隆永介萬年之

壽臣無任

云

云

又賀正旦表

元辰獻歲聿占四始之祥首祚當陽誕設九儀之會天
佑維新之景運日增永命之丕基慶集皇躬懽騰寰宇
恭惟皇上體元居正乘震執規月令周旋布政青陽之
左天時茂對同符斗柄之東懸象魏以和民垂衣裳而
恭已天地交泰茂裁成輔相之能上下志同繼明良喜

起之盛當三元之令節適百辟之來王南面受圖中庭
旅賁執玉帛者萬國舞干羽于兩階日月光華旦復旦
于元旦臣民滌盥新又新而作新高居絳節之朝洞啟
蒼龍之闕卿雲縹緲瑞藹繽紛臣等叨侍清班忭逢綬
典沾濡德澤隨萬物而生輝感格聲容偕百獸而率舞
效王公之上壽獻椒柏以稱觴瞻望青旂知天顏之霽
豫傳呼綵仗聆玉語之春溫仰陽德之正隆荷乾元之
大造三靈協順與三朝而俱升百福永綏衍百祥而並

受履端於始舉正於中歸餘於終期三百六旬以成歲
如山如阜如岡如陵如川方至膺億千萬壽以統天臣

無任

云

云

又賀正旦表

伏以兆正三陽茂協履端之慶歷新二紀忻逢布象之
和品類作而咸亨乾坤交而成泰呼萬效祝擊壤騰歡
恭惟皇上道合無私德建有極垂衣裳而撫四海察璣
衡以順三辰行太平有道之長臻端拱無為之盛日行

黃道藹瑞氣於正元雲擁紫宸極休徵於獻歲四方來
賀鵲驚之抃舞充庭萬國稱臣玉帛之旅輸盈府春從
天上草木生光澤布域中華夷恭戴臣等幸班禁侍久
沐恩私犬馬無知願竭服箱之力乾坤罔極曷申補報
之私忻戴微情倍萬恒品伏願五福時斂百祿是邁王
道偕日月而並明聖壽與天地而同久臣等無任
云
賀建慈慶慈寧兩宮表
云

伏以並建慈宮新一代尊隆之典光輝祖構壯九重鉅

麗之觀貽萬世之洪休風四海以純孝鴻名昭揭駿業
備成歡洽寰區慶綿宗社臣等誠懼誠忝稽首頓首上
言竊以聖人之德莫加於孝天子之貴必有所尊姜嫄
肇稷以配天簡狄生商而受命粵惟坤元之效法式開
乾運以當陽是宜兼尊養之隆爰以篤育成之慶長樂
有聞於漢世興慶實紀於唐年義本無稽制亦未稱曾
如聖代獨創宏規法象上接於鈎陳位置適當於震兌
千楹岳峙百棟雲興岌臺殿之嵯峨翼廊廡之窈窕層

階阿閣既軒豁以崢嶸奧室曲房亦虛明而娟靚簷牙
屹以並望輦道宛其中通左慈慶右慈寧名實昭乎日
月祖太任母太姒福履協於天人豈惟隆孝養於一時
益將垂法制於百代信王者之備物見聖人之盡倫事
耀前聞業彰盛德茲益伏遇皇帝陛下道高萬古德配
二儀究仁義禮樂之精微得堯舜禹湯之純一大孝格
於天地至德感乎神明酌典則以兼法前王善繼述而
增光列聖惟立愛莫先於老老而推恩必始於親親用

寅重乎母儀示日嚴乎子道龍樓問寢儼天步以雍雍
鶴禁承歡奉慈顏之穆穆嗣帝厯無疆之佑集仙源積
慶之圖茂衍新祺彌膺多福此實我皇上孝心篤至睿
性高明振無前之休以垂子孫億萬年無疆之慶者也
臣等幸際熙朝恭逢盛事歡同燕雀依大廈之帡幪班
列鴈鴻奉宸旒於清穆五雲絳闕宵輝南極之星萬歲
玉卮晝永東朝之日伏惟皇極茂建大道允升一孝立
而萬化行百順從而兩儀奠徽猷懿範世揚文母之休

嘉聖子神孫克對皇天之眷命臣無任

云

賀醴泉表

伏以二氣委和慶澤啟華池之瑞萬靈禔祉祥原應清
室之符惟聖德速於感通故休禎必以類至矧茲上瑞
洽於明辰昔陶唐之德茂清平若有夏之化成俊乂必
稽盛世迺協殊祥豈惟漢室中元之僅聞寧多宋時陽
趾之一見歷宣往牒殊溢前休茲益恭遇皇上道合乾
行德同坤厚茂澤旁滋於觸類汪恩普施於同仁是以

天錫休徵地宣靈祕神流浚發靈液潛通初汨汨以微
輸遂源源而畢達嗽瓊噴雪吐碧瀉青湛天光於一泓
映日華於四際弗先弗後允將誕聖之期非邇非遙適
在殿廷之介雖卿雲絢采未踰斯神釀之奇縱璫露飛
甘豈若是靈膏之潤誠昌時之瑞應而一德之明徵也
臣等職列清班恩沾霈澤欣逢慶典揄揚同寶鼎之歌
快覩珍符稱頌擬溫泉之賦伏願三靈効職百福攸同
率土清寧賴一人之有慶自天申佑祝萬壽以無疆臣

無任云

云

賀白鹿表

伏以聖主當陽茂建昇平之治皇天眷命屢徵物產之
祥和氣之所深培化工之所甚秘生非偶爾出固應期
仰惟我皇上盛德統天至仁撫世妙參三極高蹈百王
謳歌盡四海之臣民休澤被兩間之動植大塊積氤氲
之化玄機運發育之功有鹿甞甞抱竒姿於中野厥形
濯濯稟正色於西方霜毛蒙茸皓質鮮潔隨常貢而遠

至充彤庭而並陳既疑出自於冰山復訝來從於庾嶺
華林內苑益為天上之珍至性靈心自是仙源之種閒
雅有度馴伏不驚真同雍時之麟來擾周文之囿覽觀
往古總會前聞雖曰產不絕無然皆出非其正惟軒黃
世曾一見遂得上真若老子乘以誕生聿開玄道皇上
肇降之日適此禎瑞之來誠萬歲之貞符為千古之盛
事臣等心同葵藿德戴乾坤罄一毫捧日之私祝萬歲
齊天之壽心雖罔極言不能宣伏願天地位而一人安

陰陽和而萬物育諸福畢至承帝眷於益隆大化永孚
繫苞桑於彌固臣等無任 云

賀靈雨表

伏以玄修昭格天心鑒一念之精裡靈澍流滋聖德感
兩儀之順應寰區浹潤匝宇沾濡九重荷帝力於不言
萬類仰神功於無象茲者恭遇皇上道通三極德徹九
玄念民事之維艱憂先稼穡欲歲功之時叙望切雲霓
頃默禱於清宮爰精修夫玄典油雲觸石感通應六禱

之誠靈澤流膏優渥慰三農之望沛流泉於井谷覃餘
潤於田疇物與時欣德隨天降臣等恩同沾被報之涓
埃時獲休徵願頌雨暘之若年占大有豫祈稼穡之成
皇恩滲漑於無疆帝社綿延於不匱臣無任云

賀擒虜賊表

具官某等謹奏為慶賀事嘉靖二十三年十一月十一
日恭覩皇上以擒獲逆惡首賊王三等告謝郊廟社稷
臣等誠懼誠忤稽首頓首上言稱賀者伏以天動明威

聲雷霆於九有帝昭聖武廓氛祲於八荒中外歡騰兇
殘殄絕惟威靈之感召故忠義之奮興仰惟皇上德契
重玄道通三始昭事上帝而上帝居歆統攝萬靈而萬
靈効順假神通以肅清六合資玄佑以康濟兆民事有
出於不虞變或生於所易干違憲典悖逆天常雨露之
施雖無擇乎禾秀梟獍之性實自戾於生成逆賊王三
者本我邊氓原非異種徃因風塵搶攘遂乃逋越叛亡
頓懷蛇豕之心遠棲沙漠之地忘乾坤之大造安養

之微私謂天道可以或逾而王法可以終追大集醜類
屢犯邊陲肆意虔劉恣行劫掠兇稔惡極三辰已昭藉
其辜罪積貫盈九幽乃陰褫其魄假手義勇効力擒獮
向若虎狼之在郊劇有噬人之勢今如雞鶩之就縛曾
無折垂之勞非緣神助於冥冥豈得功成之易易是宜
梟之太白以正亂賊之誅懸之邊隅用示遐荒之警即
今羽翼之既剪行將種類之漸除震驚瓊表之心發舒
神人之憤尊國勢於難犯消邊患於未然宗社有靈臣

民具慶臣等章縫在列文墨是司志切憂時漫許平戎
之策力慚執驚曾無負矢之能喜聞一士之成功想見
三邊之息警依彤庭而稽首向楓陛以颺言伏願無怠
無荒益務內修之實有嚴有翼不忘外攘之心固海宇
以同春奠皇圖於永固臣等無任 云

擬謝賜御製重華等殿置經書備覽詩表

具官某伏蒙聖恩頒賜御製重華殿各置經書備覽詩
者載藉森嚴肅宸居之廣貯奎章炳煥拜皇澤之下施

渙命來自九天睿識超於千古丕承至治宏闡聖文戴
乾坤高厚之恩被日月光華之燭謹據誠而獻頌恭對
闕以颺言臣某等誠懼誠忤稽首頓首竊惟帝王之學
本於心帝王之心達於政推之制作之實用固皆彌綸
之大端粵自八卦畫於羲皇而文字始立一中發於堯
帝而道學攸傳虞舜之勅天時幾商湯之明命顧諟敬
止務緝熙之學燕居陳戶牖之銘此古昔獨盛於帝王
所以並隆於治化降是而後義實眇聞問學留心徒事

虛文於口耳詞章究意率矜小技之雕鐫然且上下相
誇後先逋述孰是身心之益曾無政治之裨歷選前代
以來未有今日是舉茲蓋伏遇皇帝陛下聖神文武中
正齋莊至德上契乎重玄洪仁丕冒乎率土興居儆惕
檢身常恐未遑夙夜憂勤求治真如不及五兵盡戢動
四海之歡歌諸福畢來蒸兩間之協氣皇風沕穆世教
休明誠太平有道之時極天與人歸之至頃於治理之
暇欲加游息之功謂為益宜莫如書故開卷必有所得

命諸殿閣悉為貯儲大訓法言在在具足牙籤錦帙種
種精嚴天步所臨不必遠攜近挈聖意所及即可隨取
任觀惟茲一念之微實為萬事之本蓋天下之道固不
萃於經書人主之心必當有所係屬皇上樂觀典冊靡
間斯須是誠參前倚衡日周旋乎斯道執盈捧玉儼對
越乎神明其於繕性養心益有默契潛孚之妙推而御
民撫世實多前言往行之資君德攸闕治道所係此皇
上超詣獨出之見得於端居靜養之餘既非有所率循

亦不由夫啟告爰揮睿藻用述皇情探義理之淵微闡
聖賢之蘊奧培一心以學而善端日資貫萬事以心而
幾微必察神明以徹合帝則而無愆德業乃昌紹前休
而克配謙虛望道學古得師不息著日新之功主敬造
聖修之極由是而參贊化育由是而奠位乾坤惟體驗
工夫之極純故功效發越之甚大典謨帙內何殊執中
精一之言風雅篇中允契維天於穆之語會千聖之心
於一旦括羣經之旨於一詩聲動宮商光騰奎壁帝王

之文之盛其又何以加焉聖人之學之全蓋已盡於此
矣顧皇翰真同乎琬琰抑湛恩俯及於臣隣臣等並以
顓蒙之資素媿身心之學念微涓細壤智無補乎崇深
而蟻涸葵誠志實切乎將順重叨錫賚愈切戰兢詎惟
謹襲以世藏恒當洗心而日誦天地之全體雖非意度
之所能窮日月之隙光猶幸窺測之微有見欽戴皇猷
之盛節行看聖治之大成伏願有始有終益勤益敬以
孔子之言為必可法以堯舜之道為必可行期致明徵

務求實踐誠通三極功並兩儀囿斯民於不識不知措
斯世於大化大順臣無任

云

云

致仕後賀聖節表

慶協誕祥德福兼隆於天縱仁逾必世華夷均被於日
中秋際仲而且浹旬宣八風於閭闔電繞樞而虹流渚
兆六符於泰階誠九寓同歡為百王獨盛者也茲益伏
遇皇帝陛下道合上玄剖神符以配帝化行無外握靈
契以維坤禹迹中興道已崇而心下舜華重協德愈盛

而撫謙應一元十二萬年卜修齡之伊始肇九重三十
二載觀景命之方新萬國咸寧昭太平於有象諸禎畢
集迓初度以開先嘉氣充盈休光炳煥呈上瑞於白兔
發盛德於金精氣應西成律調南呂天香乍騰於紫禁
月色將麗於丹霄正治隆化洽之辰極天與人歸之至
矧茲臣庶曷瑩名言臣樗櫟腐材江湖遠跡章縫竊幸
恩榮特賜於始終芹曝有懷瞻戀敢殊於仕隱丹心為
國竟何補於乾坤皓首戀君實不忘於猷猷歌堯風而

擊壤望魏闕以呼嵩伏願皇極彌昌天休滋至輝照南
極凝萬壽之無疆心拱北辰仰一人之有慶臣某無任
瞻天仰聖欣躍慶戴之至謹具表差義男某賞捧奏聞

文簡集卷四

欽定四庫全書

文簡集卷五

明 孫承恩 撰

疏

請皇太子出閣讀書疏

具官某等謹奏為禮儀事臣等並以庸愚荷蒙皇上簡拔列職官僚媿無以仰答聖恩於萬一邇者恭遇皇上念皇太子冠讀維時特命輔臣猥及臣某查議舊典擇

吉舉行此實宗社無疆至計綸音一播中外臣民踴躍
稱慶臣等職當輔導方與衆拭目快瞻盛典繼聞禮部
有暫輟之請伏蒙皇上降諭輔臣只可移取通利之辰
不宜暫止此誠皇上遠覽獨斷慎重國本至意也臣等
切思皇太子方當幼齡未勝繁禮若稍簡易亦必能行
但今宮中演習左右內侍率皆朝夕與居易於玩狎將
順則有匡正則無演習之時或多扞格先儒有云習與
智長化與心成是以古人尚有襁褓之教以成養正之

功冠禮雖云一事固至教之攸寓益不惟期以成人之道而謹其儀節正其心志作其精神端其趨向所關匪細況皇太子岐嶷之質準以祖宗法制早誨豫養實在此時臣等欲望皇上先令皇太子躬行朝謁皇上親閱其拜稽進退之度如有稍不合式即賜面諭夫皇上有君之尊有父之親臨之在上皇太子嚴敬心生教必易入且得躬觀皇上天德巍巍一言一動莫非觀法所謂不言之教默契潛孚感化尤速至於東宮內侍人員更

望天語叮嚀令其仰體皇上至愛至教之意各事之以正俚言褻語毋得一入其耳戲狎無益之事玩好不中之物毋得一接其目皇上既身教於上而又令內侍祇承於下將見皇太子言動日謹禮文日閑如聖諭所謂移旬演習自熟端必然矣其冠讀舊儀仍乞皇上親賜裁省乘此春和舉行則上足以副皇上佑啟之心下足以慰臣民願望之意宗社幸甚天下幸甚

請二王出閣講讀疏

臣惟自古帝王享有天下思欲開萬世無疆之業莫不以儲嗣為重而儲嗣莫不以教養為急誠以儲嗣者繼紹大宗統承天位異時君國子民責任攸在夫人必教而後習而教必以豫是以古之帝王無不以是為重且急也伏惟天眷聖明皇嗣蕃衍恭聞二皇子睿齡已長英質夙成固各有為善之資則教養之務正在今日譬之金以煉而益精玉必琢而成器則豫養以成德豫學以明理其事一也臣伏見皇上頃者剴諭輔臣欲為二

皇子議舉選婚之典此實宗社大計皇上不俟人言特為念及益天啟聖衷意有所在 中外臣民無任忻慰臣等庸愚繆叨侍從荷蒙聖恩拔擢濫職官僚固輔導東宮之官則所以將順德意之美者非臣責哉臣愚竊惟學記云當其可之謂時今二皇子之年維其時矣則出閣講讀在今日豈可緩哉或言東宮冊立大典未行名位未辨若講讀之禮須冊立舉而後可及臣愚竊謂時易過而難留心常懈而易置只今冬寒歲暮固不及舉

迨明春和暖景日休明講讀之舉允宜其時冊立婚選
皆禮部事臣不敢知至於講讀之請則臣之事臣不以
時進言則不惟上負皇上任使之心下貽臣僚鰥曠之
誚臣之為罪其將何辭臣愚妄意今新正伊邇乞勅禮
部欽天監揀選吉日請二皇子俱暫以親王禮出閣講
讀惟皇上命官教道之聖子天聰啟悟必易俟皇上淵
衷既定然後再舉鴻儀崇登鶴禁選婚分封之典以次
施行其於事理未為不可如此則養以豫而睿德早成

學以時而令資益茂上之可以為聖次之可以為賢上足以慰皇上貽謀之遠下可以慰臣民瞻仰之素而愚臣鰥曠之罪亦可以稍逭萬一矣干冒天威罪當萬死伏望皇上俯鑒臣愚曲垂寬宥豈惟臣愚幸甚天下臣民不勝幸甚為此具本親齋謹具奏聞伏候勅旨

請二王講讀第二疏

謹奏為請二王及時講讀事臣惟人必學而知道道以學而後知人之不可不學也記曰禁於未然之謂時學

之不可以後也。蓋凡士庶莫不皆然而況帝王之子及
時務學其所係甚重而顧可後哉。故曰化民成俗必由
於學。古之王者建國君民教學為先。伏見裕王景王二
殿下近已舉行冠禮。岐嶷卓異英姿秀出。睿德夙成。中
外臣民得於瞻仰傳聞莫不忻慰。臣惟冠者成人也。聖
父在上將責以為人臣為人子之道。古者十五入大學
學也者。正所以學乎此也。二王固各有為善之資。則今
亦惟務學而已。蓋雖以聖人生知亦未始不學。孔子十

五而志學臣謂二王旣冠以後出講務學當以次及而逾旬不聞意皇上淵衷益已豫定不敢率易進言煩瀆後該禮科給事中章适疏請講讀隨該禮部題覆奉聖旨這事朕與卿計令舉行何待适言臣竊謂淵衷果自有主非臣下所能測識也然伏俟又已二旬尚未見聖裁臣愚竊謂時者易邁而不復二王講讀已自過時若復因循怠緩坐廢光陰則理義將蔽於見聞德性將移於習染雖有令質而末由知道則於所以為人子為人

臣者恐未能各盡其當然無以副我皇上之意也臣愚
不勝拳拳只今時日清和上下恬熙朝野安靜正惟讀
書講學之時伏望皇上勅下禮部行欽天監揀選吉日
命二王出閣講讀教導之官惟聖意所用則啓迪之下
理義日明涵養之餘德性日熟開悟通達堅定純固上
可以為聖次可以為賢稱其為大聖人之子而我皇上
貽謀燕翼之心其永慰矣臣犬馬之齒已七十一歲衰
老日甚疾病纏綿計日待盡豈復更有希冀但受皇上

簡任厚恩而官以侍從為職朝夕恐恐無能少伸裨補
仰答恩私故敢冒昧披瀝誠悃干冒天威臣不勝恐懼
戰慄俯伏待罪之至謹具本親齋奏聞伏候勅旨

請冊立東宮疏

請及時舉建儲大禮以重國本以培國祚事臣等竊惟
元良係天下根本建儲實宗社永圖見於詩書所載古
今明徵皇上聖明天縱固已早見豫計何待臣下淺陋
之識仰贊萬一惟聖學須於豫養嗣德罔不在初古者

十五而入大學自天子至於庶人共之自昔聖帝明王
暨我祖宗列聖莫不致意於是誠以遠貽謀重國本也
然必冊立之典定而後可及於講讀冊立定而名分正
講讀親而聖學明今天潢衍慶已及茂齡而鶴禁尚虛
鴻儀未舉此必以深柴於淵衷而天下臣民之所仰望
者也臣等並以庸愚叨荷國家作養臣近又蒙皇上矜
錄於廢棄之餘以逕輔導之職竊祿以來未有寸補顧
今國家之大計與臣等之職守莫有重且急於此者輒

冒昧陳懇儻蒙聖明俞允下臣議於所司具儀上請欽
定乘此春和舉行則名分既正教養亦豫承祧主宅隆
燕翼於靈長而積學修身及春秋之鼎盛國本以定睿
德以成宗社無疆之福端在於此也伏惟聖明俯賜採
納天下幸甚臣愚幸甚臣等不勝瞻仰祈懇之至為此
具本親齋謹具題聞伏候勅旨

請冊立東宮第三疏

請及時舉建儲大禮以重國本事臣惟太子者天子之

貳上承列聖之宗祧下開萬世之統緒是以古帝王之
膺歷受圖貽謀膺嗣與臣下之進言入諫為國効忠莫
不以早建豫養為務我國家為重詹府之制設坊局之
官非以備人員而已臣以庸愚濫當宮僚之首念惟皇
子年及十五正宜出閣講讀之期而名稱未正震位久
虛是在臣職所當言此而不言臣則有罪於本月某日
冒昧具疏陳請候命連日未蒙賜允施行仰惟皇上宸
衷淵穆固非臣愚所能窺測但惟建儲國家至大至切

之務以其時則不可失以其事則所係重臣先年嘗待
罪禮部兼職宮詹中蒙恩准休致去自分沒齒田園無
望仕進而獨念叨沐國家作養三十餘年之恩未有毫
髮報稱餘非所及獨建儲一大事恒切於心繼聞禮部
嘗題請二次俱未舉行顧臣身在草莽無由自効夙夜
耿耿常恐溘先朝露且不瞑目幸蒙皇上不終廢棄復
賜召還職專詹府臣竊自謂賢俊滿朝任使無缺而復
錄及臣者意者復欲責臣以輔導畢此一大事臣之朴

忠庶得少償矣乎深竊自幸是以力疾兼程而來以仰
副皇上盛意比至受職造次未敢為請繼則復值國事
搶攘尚猶不敢煩瀆茲忽又已更歲只今春氣和煦朝
野恬熙舉行大禮更復何待是在皇上一措之意而已
臣今已七十二歲犬馬餘生知復有幾皇上之所以用
臣與臣未畢之志誠願及未填溝壑得覩熙朝鉅典以
効涓埃仰答天地洪恩於萬一故敢不避譴責再進狂
言干冒宸聽罪當萬死伏望矜憫臣愚少霽威嚴俯垂

寬納豈止臣一人之幸將宗社之靈實與聞之臣無任
激切仰戴祈懇之至為此具本親齋謹具題以聞伏候
勅旨

遣永明殿上香謝恩疏

地接皇居啟宮牆之肅穆禮隆道統揭昭事之崇嚴奉
帝命以將承豈臣愚之可稱慙惟汗下心切永兢恭惟
皇上以神聖之資膺君師之任惟古是則欲大有為謂
道原於天允在人以承其緒道傳於古當自我以會其

宗上遡羲軒下及周孔創永明之邃殿安列聖之神靈
定涓朔望之辰一展瞻依之敬顧萬幾之時繫或遣代
之間行濟濟大僚孰弗宜於任使庸庸末品敢冀望於
眷存仰鈞恩知非承乏重琳瑯之御筆題犬馬之微
名初傳示而若驚繼奔趨而恐後金門乍闢瞻星月之
在天玉殿遙開覩豆籩之敷席循墻跼蹐執事屏營達
帝德之精禋竭臣恭之稽拜盛典肇隆於明代睿謨實
耀乎前聞伏願道務躬行建皇極以刑四海德惟善政

敷至治以康兆民大化顯行皇圖永固臣無任

云云

陽慶進香謝賜銀幣疏

一陽肇復再惟玄典之修百辟寅承式體聖心之敬固

臣子當然之分無分毫可錄之功冒叨渥賞之駢蕃俯

媿辦香之微末臣無任

云云

請九門施藥疏

具官某等竊惟聖人憂民無所不用其極凡饑寒疾病
舉切吾身先事而預為之防患至而曲為之處仰惟我

皇上此心實與古先聖同符合轍身居清穆心在閭閻
屢詔有司賑恤貧賈拳拳之念上徹穹玄臣等竊見比
者時當盛暑炎氣鬱蒸積疹成災散為疫癘傳聞都城
內外民無老幼傳染甚多僵仆相繼況窮巷蔀屋單夫
寡婦食不充口一有疾病醫藥尤艱坐視危殆臣等考
之周禮醫師之職其屬有疾醫以掌養萬民之疾病凡
有疾病者使分而治之所以惠養黎元重恤民命為慮
周矣臣等愚見伏望皇上勅下太醫院差官督同順天

府惠民藥局給散藥材檢驗方書某方可防未病某方可治已病考論運氣量治湯藥分撥醫士九人於九門人烟輳集之處招諭給散庶幾未病者得先事可免已病者亦不至顛危其於貧窶之人尤為便益天心降鑒雖有厲氣不為災矣臣等以庸碌備員無能仰贊聖化偶有所見謹用上陳干冒天威下情無任恐懼隕越之至

謝賜藥疏

仁民利物聖人存博施之心拯困扶危王者有補天之
政肇為醫藥爰濟沉痾道雖昉於古先事則盛於今日
臣民具屢感激難名仰惟皇上道契羲皇心含造化以
萬物為一體視四海為一家保民如傷求治不及頃因
時饑作疹遂致疫厲肆行既納臣言命所司廣為治療
復厘宸慮謂庸術渺克奏功俯念民艱勞神運爰稽
祕錄酌病宜以製方特發內藏備珍材以成劑九門施
散爭來遠邑之民萬口歡呼頓脫顛連之苦溥玄功於

不宰妙神化於無為謂臣等昔疏請之與聞繼奔趨之
有事眷懷均惠特命寵頒榮捧而歸式覩妻孥之驚喜
珍襲以待何虞疹疾之侵陵助蒲柳之衰姿激風雲之
壯氣自今以往皆仰藉於生成此身之餘更無以為補
報臣無任云

施藥復命謝賜銀幣寶鈔疏

具官某恭遇皇上以朝天等三宮門外欽施御藥命臣
等提督施散事竣蒙聖恩賞臣等各銀三十兩綵段二

表裏新鈔五千貫謹稽首頓首祇領訖除赴鴻臚寺報名廷謝外伏以聖人存心斯世洪仁丕冒而弗遺王者加惠窮民善政曲成而無倦憫物疵之莫救出神劑以敷施渙命祇承寵頒濫廁名言罔既感懼交并仰惟皇上愛洽黎元恩同大造視札瘥之在下若痼瘕之切身道傳羲聖之真法用桐君之妙鑿都城而普濟即如意以名丹廢疾皆痊枯槁受回生之賜沉痾並起殘癰全未盡之年功覃生育之仁道合培成之化臣等備員供

事有媿贊襄雖殫犬馬微勞奚補乾坤大德幸迓嚴譴
誤被溫綸賞既懋於鼎來榮逾加於晉錫白金耀目綵
服飾躬寶鏤駢蕃書囊充溢叨茲異數實倍常倫心仰
戴於鴻休喜不勝於雀躍伏願神功默契膺百順於無
疆大化旁流保萬物於咸若聖壽川增日至皇圖地久

天長

云

云

再遣施藥事完復命疏

具官某等伏以天地以大生為心合羣品而並覆聖意

以弘仁為念無一日而或忘思之也必周防之也必豫
至於醫藥尤切民生然歷觀前代之君率莫究心於是
乃今製為成藥况復頒自尚方曠古所無盛時僅有仰
惟皇上心同造化惠洽黎元曲成不遺廣祖宗惠民之
術遍育無外體皇考愛物之仁旁推輔相之宜恒切痼
瘼之慮醫有活人之責藥無愈疾之能悼彼顛連不可
計數凡其不救之廢疾豈皆已盡之天年方固有通神
之功人實難希世之遇聖心弗念民命孰憑恩無間於

富貧施必先乎老弱填衢溢巷羣來遠近之民舉手傾
心盡感刀圭之賜化機默運帝澤旁流益自春之頒已
喜沉痾之漸少由今以往懸知民物之大康鼓元氣於
寰區布太和於宇宙著參贊之明效成位育之極功誠
為德冠百王功高千古者也臣等再奉聖旨一遵成規
濫與奔趨無能贊助覩茲盛事庸展頌私仰天地之仁
而誠不自喻固乾坤之大而口莫能言惟暨臣民同一

懼忤

云

云

施藥事完復謝賜銀幣疏

具官某伏以綸音溫被荷寵渥之自天寶藏分頒愧報
稱之無地省躬知懼揣分難消臣誠惶誠恐稽首頓首
恭惟皇上帝大德配天至仁育物軫念君民之一體為圖
生殖之萬全金鼎飛丹七返華神醫之妙瓊宮普惠九
秋回帝域之春臣等猥以庸愚叨承任使因人成事深
虞德意之尚孤惟帝具天雖在微勞而必錄包涵無外
錫予有加彩帛承筐顧補袞之何力帑銀在筭於作礪

以無能實多蚊負之慙惶叨沐鴻恩之浩蕩敢不志堅
百鍊仰沾銘鑄之休行累一絲勉効忠貞之節伏願仁
風敷暢和氣四周至治無虞被祥光於八表太平有象
普福廕於萬年敷同四海之心共祝一人之慶臣無任

云

云

請給藥九邊將士疏

具官某等謹奏為廣聖恩重邊圉以激勵人心事臣等
竊惟聖人愛民之心無窮而勢則有限以有限之勢而

欲盡無窮之心則其推之也必有道處之也必有術是以博施濟衆為堯舜所難而天下萬世稱其仁者惟是故也仰惟皇上愛民拳拳仁同天覆頃者念民生疾疹世醫既無善藥貧者况莫致醫一抱沉痾多至不救是以特稽祕錄製造神丹遣臣等於朝天等三宮給散民庶臣等欽遵督同委官并地方人役連日施散凡遠近軍民老弱有疾隨請隨付莫不歡呼踴躍而去其報服飲有效者日不下數百轉呻吟於謳歌置天札於仁壽

甚盛事也臣等竊惟皇上於畿甸之民三施藥矣蓋自二十一年之夏與今歲之春并今次所施霑被聖恩者殆將百萬輦轂之下亦已週遍浹洽俱獲生全矣惟是限隔遠地為皇上守禦邊圉之臣與夫披堅執銳之士沙漠苦寒之處醫藥少通聞其有疾病者惟事巫覡不知治療雖有官醫在軍亦不過虛應故事是以沉痾展轉顛危暴卒無所倚賴戕傷尤多念其同戴堯天同瞻舜日聞皇上有此施藥之舉翹首企足寧無欲得之願

夫聖人之仁篤近舉遠皇上雨露曠蕩之恩篤近者不
啻足矣舉遠者有未遍也臣愚伏望皇上一面委臣等
照舊京城給散或成藥尚有餘者差官二三員分投齎
送各邊上令彼處巡撫都御史量為給施其將官等或
三袋或二袋軍士各一袋散畢各造冊繳奏不惟病者
得以生全抑使人人知我皇上存念疎遠加意邊陲恩
洽則感深感深則思奮思奮則氣倍氣倍則戮力其為
邊圉之助豈少哉夫古人投醪挾纊者尚可以激勵士

心故宋祖賜西征裘帽三軍感泣况皇上以真德實惠
溥及萬衆其所以感刻而思報者又當何如也臣等才
識庸下濫蒙皇上委任仰惟神謨天運豈尋常所能窺
測萬一偶有此見輒敢冒昧上聞狂妄之罪惟皇上俯
加矜察焉臣等無任隕越戰懼之至

文簡集卷五

欽定四庫全書

文簡集卷六

明 孫承恩 撰

疏

顯陵興工祭告題知疏

具官臣某為欽奉勅諭事謹遵奉欽定十月二十五日
未時吉恭行祭告興工訖仰惟皇上孝思無窮園陵軫
念頃因修飾之舉益崇哀慕之情臣以庸愚濫承委任

星軺夙夜敢辭奔走之勞天語丘山殊切淵冰之懼整
齊庶務戒約百司儼二聖之對臨竭一誠之昭格雲陰
開朗風日晴和庶民子來衆藝畢集即人心之趨事知
大工之亟成臣叨與盛儀榮逾素分仰瞻紫極修封疏
以遙馳俯瀝丹誠冀宸衷之稍慰為此具本差承差胡
朝宗親齋謹具題知

顯陵工完祭告題知疏

仁人盡親愛之誠有感即觸大孝極終身之慕無時或

忘矧惟陵園尤切軫念肆殿宇之少敞為聖心之深憂
發命詢謀擇人任事專大廷之元僚以董其務付禁近
之親臣以監厥成官必備乎庶員工必選乎衆藝事當
再舉計出萬全惟及時以圖為故事易集而財不費惟
得人以綜理故工具美而日不逾復棟宇之巍莪增山
陵之氣勢臣以庸陋濫司禮儀精白仰聖訓之昭昭恪
恭奉王言之凜凜駿奔從事雖夙夜之不遑冰兢積中
懼愆尤之不免叨榮異數一快平生詠先皇德澤之隆

仰大君制作之盛山川盤亘王氣鬱葱莫罄揄揚徒增
欽歎神靈千古莫鴻業於無窮彤史萬年貽聖謨於不
朽為此具本

云

祭顯陵事畢回京謝賜銀幣疏

具官某欽蒙遣祭顯陵畢回京復命伏蒙賜銀貳拾兩
紵絲二表裏鈔一十貫臣謹頓首拜領訖竊惟聖心永
孝特虔遣告之儀臣職何裨敢受殊常之賜衣裳在笥
彰華耀於匪頒寶錫席珍戴光榮於晉錫顧惟膚淺濫

沐寵榮此益恭遇皇上大孝格天駿命聿隆於祀典至
仁覆物鴻私仰荷於崇褒臣荐承高厚之恩莫罄涓埃
之報服之無斁終身永佩夫絲綸守之如泉日用敢忘
於陶冶伏願文謨武烈治兼三五之英聖子神孫派衍
億千之盛臣下情無任云

顯陵工完謝賜銀幣疏

具官某欽蒙聖恩賞銀叁拾兩紵絲二表裏臣謹頓首
拜領訖伏以陵殿重新禮稱尊崇之典聖恩廣被貺多

繁縟之儀賞既懋於鼎來榮逾加於晉錫白金耀目綵
幣章身揣分奚堪省躬實懼茲益恭遇皇上制作開先
規模裕後竭精誠於霜露永伸終慕之懷渙綸綍於日
星大布匪頒之賜至如凡品亦誤殊恩臣敢不服以自
珍藏之為寶鈞鎔陶冶寧忘作礪之資衣被裁成尤切
不衷之誚伏願廟謨光大益宏錫類之深仁天眷靈長
昭受顯親之遐福臣無任云

景命進香謝恩疏

星宮毓瑞賀元造之再週景炁凝華會長年之二慶崇
修丹籙翊贊玄儀集萬福於聖人竭一誠於臣子瓣香
上進大賚下頒愧叨金帛之榮慙竊珍羞之異永言戴
荷莫罄揄揚臣無任云

陽慶進文字謝賜銀幣疏

香炷冒陳已荷隆恩之寵錫科文恭進復驚渥賞之下
頒撰述在侍從當然玄典矧聖明至重雖編摩終歲是
亦未足為勞顧纂輯暫時而可即為盡職精工文綺生

光衰老之軀璀璨良金增重寒儒之篋是於履長之一節幸叨拜賜之兩番固由撫養之至仁恐為公家之屢費欲控辭而弗敢強登拜以未安藏之中心誓捐糜於此日懷之沒齒擬銜結於他生臣無任云

景惠殿工成祭告謝賜疏

肇隆新祀曠典殊聞恭荷祭餘洪恩均沛伏以醫與儒道而同用藥為民命之攸關爰稽上古聖神乃始創為法制下及歷代賢哲由茲祖述益勤補造化之玄功救

蒼生之夭札是以凡有家國之寄皆當慎重於斯然而
報祀禮文率多循襲簡陋不有大聖之作曷觀曠古之
規恭惟我皇上道統三元德冒九有心存黎庶頃刻不
忘於懷政寓仁恩無往不用其至謂茲醫藥尤切民生
式修昭事之儀以示隆重之意鼎新殿宇極偉麗於觀
瞻寅勅臣工竭肅恭於妥侑冀感孚於默默獲顯相於
昭昭臣等叨與禮官覩茲盛事傳頒膳服仰大造以洪
施飽溢肺腸媿素食而無補伏願一人有慶四海同春

軒岐之術大明和扁之流繼出鼓太和於宇宙敷天坐致乎雍熙復元氣於渾淪率土同躋於仁壽聖心以懌王道永昌臣等下情無任

云云

歲終例賞謝恩疏

明主蓄臣以充任使之用人臣効職當躬夙夜之勞匪惟義分之固然自是施報之宜爾顧食祿已叨於周歲又匪頒忽見於一朝拜賜自天措身無地仰惟皇上用人不遺寸善施恩每越恒規沛汪澤於天心出下情於

意外臣顓蒙無似侍從濫塵雖鉛槧勉竭於晨昏媿淺庸無裨於絲髮何期大賚亦並諸臣璀璨良金藏衣笥而增重鮮華綵繪懸書室以生輝詎輕易遂為日用之需當珍襲允為後人之守家傳盛遇世念皇恩蹇拙無才難罄感懷之語朴誠自許擔殫酬報之私臣無任云

元旦玉仙宮門慶祝疏

紫極開祥慶一氣方亨之候青華布淑正九重納佑之

辰臣某禱南岳以懽呼瞻北辰而舞蹈恭願皇上履泰
階之景運道契三玄握乾始之禎符化行九有惟清惟
靜乃聖乃神超廣成千二百之遐齡並天下萬八千之
厯數臣無任

云

辭免光祿寺日給膳羞疏

奏為辭免賜給史館酒飯事節該大學士嚴嵩題為纂
修書籍事奉聖旨著孫承恩張潮充副總裁官欽此專
在史館恭修大明會典所有光祿寺酒飯照例逐一關

支近日復蒙聖恩令臣管理部事臣已欽遵到任管事
臣切思幸際聖明猥蒙簡拔已司邦禮復領宮詹養廉
之資叨經年月補報之益尚缺絲毫倘復給於大官誠
益慙於厚饗伏乞容臣辭免前項酒飯自到任日為始
截日住支其日前所修大明會典容臣等叅校編摩候
功完之日謹當繕寫呈進庶幾微臣稍伸敬事之誠幸
逭素食之誚臣無任惶恐祈懇之至

仙慶進香謝恩疏

瑤宮久寂九重撫節以興思玄典再修百辟戴天而展
敬垂千齡之懿範脩二載之仙遊隆名極天上之尊崇
陟降在帝居之左右配天坤德允惟列聖之歆護國陰
功猶切羣生之望臣率循常職恭進炷香濫承渥賞之
恩深抱無功之媿報酬何以感刻難勝日月貞明仰大
明於一統乾坤貞觀祝嘉靖於萬年臣無任云

復謝賜藥疏

具官某伏以聖王存心無外澤務均施大智待物有差

恩必隆近欲裨民庶之全其壽尤樂臣子之同其休俯
媿顯蒙濫承優渥仰惟皇上道凝元始德契重玄體天
地以為心紹神黃而舉事謂羣情之所願欲壽實為先
六氣之所浸淫病則不免治療若非神妙顛連寧得生
全特軫皇情製為成藥既已覃施於黎庶遂因普及於
微臣恩較衆殊數於常倍豈造物錫與生成之德獨有
所偏謂臣愚俯仰繫屬之私均將是賴此實聖皇體念
之至意益增臣子激勵之微衷刻石難名糜軀曷報臣

等百拜以受什襲為藏緩急用之有餘旦夕恃以無恐
蠲除疾疹益堪趨事之勞裨助精神更有効忠之地臣

無任云

云

賀永禧仙宮安扁疏

仙宮再闢巨榜高懸龍鳳岌乎糾纏雲烟茲以涵鬱即
上天之眷佑占皇祚之方隆夷夏同歡神人共慶伏以
史冊紀禎祥事關時而必錄春秋重興作役在民而必
書長樂儲祥名雖聞於前代高閣傑構製莫傳於後人

取號實踈為義亦淺然且迹傳往昔光映瑤編而況此
仙宮定號之初實我皇上受釐之始是蓋芳騰宇宙美
冠殷周天同大而日同輝聖與謀而神與巧創茲傑製
工掩前人者也仰惟我皇上存心精默體道淵冲項因
禱祀之典屢興謂焚修之所未稱益宏聖製遂有茲宮
一木寸磚方看聚於旬日千楹萬棟忽驚覩於崇朝歷
考前聞未有其比臣目茲盛美莫罄敷宣陪醵行以入
賀難同率舞之歡望鳳闕以颺言願効梓人之頌臣等

無任云

云

祈雪進香謝賞疏

玄儀肅啟祈三白以兆年豐丹陛寅趨竭寸忱而供臣
職諒天心之佑聖鑒帝德之勤民無能贊助於分毫徒
竊効勞於奔走奉駢蕃之寵錫興感激之愚衷無說揄
揚有慚面目報酬何以乃心口以自謀佩服難忘但肺
肝而深刻

賀瑞雪疏

聖德昇聞無高弗格至誠潛達有感必通覩六出之呈
奇喜羣生之獲賴歡騰周甸頌溢堯衢仰惟我皇上德
配昊穹道同元始留心民隱無乎不即弭寧之方精意
玄功有作率為綏和之本頃因冬將逾月雪尚塵施爰
申洪典之修重為蒼生之禱瀝誠致懇浹日益虔精禋
旁達乎璇臺呼吸上通乎帝座指揮滕六號令玄冥不
後不先適惟大雪之候以慘以肅式章陰德之成實有
契乎玄功詎止驗乎穡事皇威暢達廓萬里之烽烟義

氣嚴凝正九天之肅殺妖氛遠絕疵癘不興允昭至德
之玄微實表太平之有象氣機孚格莫盛於茲帝王貞
符孰有過此臣等謬叨清秩沐浴太和際熙代之清寧
仰乾元之覆幬伏願三靈眷顧茂膺純嘏之休四海謳
歌長覩太平之象

元旦賜酒飯謝恩疏

萬福來從適屆履端之慶九重叩祝正當展敬之辰整
臣子之涓埃戴乾坤之高厚寵頒下逮跼蹐靡任在元

輔則為宜何微臣之敢冒領黃封而沾既醉食玉食而
媿素餐白首光榮幸叨承於屢錫丹心報稱擔勉竭於
餘生臣無任

云

遣祭永禧殿謝賜表裏疏

伏以玄宮創建荷天眷之潛通瑞榜宏開藉神功之默
佑信無誠而不格咸有事以為榮恭惟皇上德合九玄
道孚泰一自虔修於內殿肇舉精禋頃寅禱於新宮特
開宏構神明助化昭假居休爰從定號之初載修謝告

之典凡叨對越咸竊揄揚臣榮列駿奔寵承鴻眷効趨
蹌於展拜特軫睿衷荷珍錫之駢蕃殊越常分沾濡優
渥荷戴兢惶臣無任云

大告大典進香謝賞疏

春回海宇已看青帝之敷仁聖憫閭閻更舉玄儀而祈
歲僭表臣恭於香炷俯驚天澤於冰襟徒切感銘無能
頌禱願豐稼穡時若雨暘同熙天地之清夷永見邊陲
之寧謐臣無任云

乾光殿更扁祭告奉先殿謝賜祭品疏

華扁新更益著貽謀之盛鴻儀誕舉式彰繼志之休天道下際而常明景命適臨而肇事丕承玄貺茂集皇釐臣等莫與駿奔濫叨寵錫飲黃封而沾醉食玉食以忘饑莫喻欣榮惟深銘刻無任歡忭感戴天恩之至

給假疏

臣一介草茅淺陋無似幸際聖明濫竊侍從復蒙簡眷擢置宮僚屢叨寵賚逾於涯分但臣自去冬十一月以

來奔走道途冒感風寒偶失解發遂致兩足受傷酸痛
軟弱步履艱楚一向服藥調治罔有成效臣仰荷皇上
天地高厚之恩中心實切感激每思稱報萬分未酬故
日逐勉強趨事不敢以微疾自安奈臣稟賦素弱年齒
漸邁積勞日深前疾又復加甚自今年七月以來每至
夜分不能成寐輾轉達旦以致精神短少血氣虛耗肌
肉日就消瘦臣舉家皇皇多方醫藥迄今未獲少愈況
臣近蒙聖恩命充會典副總裁未能竭日夜之力以事

編摩病中思惟若負芒背此實由臣福過灾生不善調
養之所致也伏乞聖慈俯念衰齡曲垂矜惻特賜假日
容臣得就私宅專心醫治候將來少獲痊可即出供職
則臣犬馬未盡之歲實我皇上天地再造之恩也臣無
任云云

考滿謝賜羊酒疏

勤勞莫罄濫延六載之榮寵祿已踰仍荷一朝之賜省
循內愧瞻戴中兢伏念臣本草茅謬叅流品叨塵禁苑

荐歷清華顧資名已積於歲年而廩祿虛糜於日月方
切懷憂於瘵曠何期錫賚以駢蕃尊俎登嘉榮溢大官
之饗門閭增色恩叨內醞之頒惟天地之覆幬同仁故
雨露之霑濡畢達臣感恩罔極報德無由敢不益竭忠
誠寧自諉於篤蹇愈加策勵期少効於涓埃臣無任

云

謝賜红柿疏

華林異種出自上方綺席餘珍賜來節屋甘清玉露何

論太華之蓮味重金莖寧羨洞庭之橘生芳津於咀咽
滌塵思於煩囂感切肺腸光生几席臣薦之祖禰分及
妻孥即物興思願丹衷之自託効忠殫力仰洪造以難
酬臣無任云

謝賜香茹飲疏

時當炎暑氣滯鬱蒸我皇上茂對時育物之仁軫君臣
一體之念特頒珍劑用資攝調臣方抱微疴仰叨寵錫
感恩實同乎覆載圖報敢惜乎捐糜恭依法以煎烹謹
飲定四庫全書

不時而飲啜行看孱憊坐致平康臣無任

云

謝賜鮮柿疏

天家異品貢自親藩御席餘珍頒來下界覩顏顏之耀
日想嘉核之含春安邑之產豈同靈關之名莫並甘芳
潤頰清徹爽神仰飫恩私俯慙報稱未須百鍊擬永託
夫赤心歷自九秋擔堅持乎素節臣無任

云

考察自陳乞休疏

奏為自陳不職乞賜罷黜以昭勸懲事近該吏部題奉

欽依六年考察在京三品以上官員大臣自陳以俟聖
明去留此虞周黜陟幽明漢室考覈名實國家磨礪羣
臣之重務也臣忝從大臣之後例當自陳伏念臣一介
草茅叨居二品誤蒙皇上恩眷任用而碌碌庸庸於國
家政機無裨絲髮臣且自知莫恕何況公論可容臣觀
諸臣雖職務不同然莫不各有所事効謀宣力獨臣間
散雖有鉛槧微勞何補乾坤大造而猶濫糜厚祿繆列
清班瘳曠如臣允宜罷職臣所以跼蹐慙媿不能自安

者也臣又惟詹事職係宮僚將來輔導儲君實其職務
必得性行純篤經術通暢精力強明者而後稱臣以淺
薄疎庸既無以為異日涵養薰陶之資當啟沃訓迪之
寄而年齒衰邁視聽昏蒙竊自揣量實不能副頃者臣
以七十引年荷蒙皇上不即斥棄復賜俯留再欲自陳
深懼煩瀆茲當朝廷公行憲典大明黜陟敢瀝悃誠懇
求休退伏乞聖明將臣放歸田里別任賢能則不肖者
不得久妨仕路而朝廷收建官之效矣為此具本親齎

謹具奏聞伏俟勅旨

請老致仕疏

謹奏為懇乞天恩容令休政事臣以淺薄備員詹府虛糜歲月碌碌無庸昨於去年十月初六日因老病不能供職具本乞恩休致荷蒙皇上不即棄斥未賜允放諭以卿有疾宜善加調治不准休致此皇上俯念微臣不忍一旦棄遺洪恩浩大不勝感戴之至除已赴鴻臚寺報名初十日午門前叩頭謝恩重慚惶感深涕淚雖粉

身碎骨圖報萬分邇來又易新歲歷四月矣仰體聖諭
在寓延醫療治加意調理藥餌無日不親但臣年已七
十三歲血氣大衰非藥力所能療以是久服無效頭眩
自汗日久自虛兼以脾胃損傷時苦泄瀉百病交攻莫
可醫治舊有痰火等症近復舉發繼又感冒風寒使轉
沉重兩月以來睡臥床簀醫藥不效飲食少用勞虛憊
極骨瘦如柴轉動須人扶抱此可証驗豈敢肆欺只今
雖少進湯粥而消爍痰嗽日夜不歇漸成勞瘵實有性

命之憂倘一旦溘然朝露家鄉迢遞水陸艱難私心過
計實切愁苦人窮反本犬馬骸骨願得首丘恐不能遂
伏枕涕泣無所控訴是用披瀝誠悃哀鳴於君父之前
伏望皇上俯賜憐憫微臣激切之情容臣休致豈惟臣
不勝大幸將舉家大小感戴天恩之至沒齒不忘矣

乞休第二疏

謹奏為再乞天恩容令休致事臣於去年十一月初舊
疾痰嗽舉發繼復感冒寒邪醫藥不效展轉沉重幾至

狼狽三月有餘不能履地於今日具本乞恩休致伏
蒙皇上諭留不即棄斥臣惟君即父也父之於子不因
其子疾病無用遂加墳棄仍復保愛冀其痊愈子雖頑
冥寧不知勉強體念父心甘於自棄臣以庸末受皇上
莫大之恩雖粉身碎骨無以為報敢辭沒齒終事皇上
豈忍一旦言去遠離闕庭仰戀聖恩肝膽如割皇天后
土實所鑒臨但臣妾係衰邁病勢不支一舉一動須藉
於人雖復強留無所報効矧病日亟旦夕可慮決無痊

愈之期家鄉遠隔幾四千里未知得遂生還與否伏望
皇上俯賜憐憫早允臣去猶可不孤首丘之願微臣情
出激切言詞粗率不知忌諱實不得已非敢過為苦言
以煩瀆聖聽干冒天威罪當萬死臣無任隕越戰汗待
罪之至

乞休辭闕疏


臣頃具本乞恩休致荷蒙皇上憐臣衰老鑒臣誠切特
許俞允且賜給驛續該臣子前軍都督府經歷司都事

臣孫克宏為臣老憊遠行身無親丁侍側具本奏瀆天
聽給假送臣還鄉既憫念臣曲賜全生又憫念臣子不
奪其志使臣遠行有賴此皇上天寬地厚之德臣父子
雖萬死無以補報緣臣衰弱不能躬詣前朝叩謝除臣
子克宏赴鴻臚寺報名廷謝外臣某無任忻忭仰戴之
至謹具本奏謝以聞

致仕後聖節進香疏

臣荷蒙聖恩放歸已抵私家賴乾坤之洪造存丘壑之

餘生感戀雖深報荅無地茲恭遇萬壽聖節羣工拭目
瞻虹流電繞之光四海傾心祝天長地久之算況臣竊
祿四十餘年受恩倍尋常億萬身雖遠於魏闕祝敢後
於堯封臣謹備彩香一座託都督陸恭代進獻帝壇仰
祝岡陵之遐祉少申葵藿之微忱伏願履道凝神體元
居正玄穹默佑過周家定鼎卜年之期紫極呈祥接黃
帝迎日推筴之統臣無任瞻天仰聖忻忭屏營之至為
此具本專差義男孫齋捧謹奏賀以聞



文簡集卷六

欽定四庫全書

集部
文簡集卷八

詳校官中書_臣葉元符

中書_臣劉源溥覆勘

總校官原任中允_臣王燕緒

校對官修撰_臣戴衢亨

謄錄監生_臣張鴻起

欽定四庫全書

文簡集卷七

明 孫承恩 撰

講章

孟子講章一道

孟子曰人皆有所不忍達之於其所忍仁也人皆有所不為達之於其所為義也

這是孟子盡心下篇教人推廣善端以盡性的說話孟

子說人皆有惻隱之心故莫不有所不忍此仁之端也然以氣稟之偏物欲之蔽則有不忍於此而忍於彼者矣能即此不忍以推於所忍而亦不忍焉則惻隱之心無所壅遏而無往非仁矣人皆有羞惡之心莫不有所不為此義之端也然以拘於氣稟蔽於物欲則有此雖不為而他則為之者矣能即此不為者以推於所為而亦不為焉則羞惡之心無所間隔而無往非義矣夫仁義者天之所命而為吾心固有之理與生俱生但其端

在人發見甚微故必體驗察識即其所發而擴充之斯可以全其本然否則善端愈微生道幾息展轉汨溺將無復有所不忍不為者而仁義之性遂以枯亡此孟子教人之深意也臣惟人之有仁義即天之有陰陽仁屬陽乃天地生物之心義屬陰乃天地嚴毅之氣而人得之以為心者也然人品不同故其分數亦異惟聖人者氣質清明道心純一合下便能不虧其固有之理全得天之生物者滿腔子皆是慈愛之充周全得天之嚴毅

者滿腔子皆是道義之貫徹具於不忍不為如水之必寒如火之必熱如騶虞之必不殺是以寬裕溫柔足以有容親親而仁民仁民而愛物舉一世而涵育之發強剛毅足以有執正心以正朝廷正朝廷以正百官正百官以正萬民正萬民以正四方舉一世而裁制之盛德大業皆自其一念不忍不為者而推之也仰惟皇上稟上智之資具至聖之德存心天下加惠小民慎刑獄時頒欽恤之條念斃鰥屢行賑卹之典檢身律已敬畏自

持出入起居之罔弗欽發號施令之無不善仁義之德
與古帝王同符矣然堯舜尚以博施濟衆為難聖賢每
以理欲幾微為懼道之無窮盡也如此伏願益培善端
克新聖德休息愛養凡膏澤可以厚生民者期於必行
庶聽好察凡念慮少有乖道義者即以斷止仁之施者
愈深愈博義之立者愈密愈精以之而育萬民以之而
正萬國則德業之盛真可以比隆唐虞三代矣臣愚無
任惓惓

書經講章二道

歲月日時無易百穀用成又用明俊民用章家用平康

這是周書洪範篇箕子為武王推行庶徵之疇的說話上文既言君臣當以歲月日之間五者之休咎為徵以省已得失此又言休徵所感之效歲是一歲月是一月日是一日時是一時雨暘燠寒風五者該來的節候如春夏以燠秋冬以寒一歲之節候也六月徂暑九月肅

霜一月之節候也飄風不終朝驟雨不終日一日之節候也各以他那節候而至不少僭差休徵之應如此則其效當何如百穀是民食所資使或雨而勞暘而旱歲且歟矣今則件件皆得成熟國家政務所以為治者苟天時既逆則人事益乖今則事事皆得修明俊民是賢者若是氣運不和則天地閉而賢人隱今則賢者在位能者在職俊民則章顯矣一家之中有九族焉苟氣運乖逆則殃咎日至今則身其康強子孫逢吉家則用平

康矣是知人事之各臻其效者由天道之順其常然天道不自順則以五事之得也古之聖王所以兢兢業業惟恐少有過差修德於身以為召和之本當其時三光全而寒暑時五穀熟而人民育朝無廢政野無遺賢和氣薰蒸休嘉旁達有由然矣降及後世君道不明本之身者固多過舉疵德謬政致戾召乖治不古若亦何足怪仰惟皇上天縱聖哲純誠無疵懋德建中既足為感召之本幾微戒懼每益慎省驗之功是宜休徵日臻治

效日著然此者年穀雖登而四方常有水旱災傷之奏
政事修舉而尚不無缺欠賢才效用而亦不無淹滯荷
福永綏而前星尚未耀此皆聖明所當留意者也伏願
聖不自聖法古帝王兢業之持日慎日至俾五事之德
愈備愈隆於以迓續天休導迎和氣則唐虞三代隆古
之盛復見於今日矣臣等不勝幸甚

文王卑服即康功田功徽柔懿恭懷保小民惠
鮮鰥寡自朝至於日中昃不遑暇食用咸和萬

民

這是周書無逸篇周公述文王能所其無逸以告成王者如此卑服如孔子稱禹所謂惡衣服舉一端則宮室飲食之儉可知康功是安民之功如發政施仁除殘去暴都是田功是稼穡之事徽懿都解做美字徽柔懿恭是溫柔恭敬到恰好處如詩之柔嘉堯典之允恭非柔懦足恭者可比鰥寡憔悴須待上人加意賙卹他纔有生意這便是惠鮮鰥寡周公說昔我文王居西伯之尊

享一國之奉顧乃安於卑陋之服以即康功田功所急者安民之政所親者稼穡之勤而於自奉之樂所性不存矣且內有柔恭之德而極其徽懿之盛和易近民於小民則懷保之使之樂利安全於鰥寡則惠鮮之使之生養蘇息自朝至於日之中自中至於日之昃一食之頃有不遑暇用以咸和萬民而不使一夫之不獲益文王心在乎民不自知其勤勞至此也夫崇儉素恤窮民勤政事皆文王無逸之實是即太王王季家法而成王

所嘗率乃祖攸行者周公言之獨詳得無意乎臣聞宋
儒程子有言養身至於延年進學至於作聖為國至於
祈天永命皆工夫到這裡則有此應文王德為元聖壽
及百年子孫千億延祚八百其根本只是純一之心緝
熙之學應驗到此後世人主何憚而不師文王哉然周
公於無逸篇說文王如此其勞至立政篇說文王罔攸
兼於庶言庶獄庶慎則又如此其逸何歟蓋敬天勤民
之誠固不容已而提綱挈維之要自有所存文王之勤

異乎秦始皇之衡石程書隋文帝之衛士傳餐者矣是以學貴有常張而不弛將有進銳退速之憂政貴有體博而寡要將有君行臣職之弊惟顓以文王為法則無逸之義盡矣仰惟皇上寬仁恭儉無一念不在於民惕厲憂勤無斯須不持乎敬重農桑而民知務本發內帑而政急救荒十載之間宵衣旰食無間一日文王誠不得顓美於前矣尤願躬修玄默之化俯順節宣之宜執簡御繁濶畧細務慎終如始允升大猷觀無逸必觀立

政則知周公之所以告君觀豳風必觀二南則知文王之所以垂裕皇躬康壽膺祚無疆天下臣民不勝慶幸

孟子講章一道

帝使其子九男二女百官牛羊倉廩備以事舜於畎畝之中天下之士多就之者帝將胥天下而遷之焉為不順於父母如窮人無所歸天下之士悅之人之所欲也而不足以解憂好色人之所欲妻帝之二女而不足以解憂富人之所

欲富有天下而不足以解憂貴人之所欲貴為
天子而不足以解憂人悅之好色富貴無足以
解憂者惟順於父母可以解憂

孟子因萬章疑舜為怨其親故引舜之事推其心以曉
之說道昔者帝堯因四岳薦舜能盡孝可大用乃使其
子九男二女與百官牛羊倉廩俱各全備於以給其任
使豐其食用以事舜於畎畝之中舜之所居一年成聚
二年成邑三年成都天下之士多願就之者堯以舜這

等賢聖乃將相視天下而移以與舜焉然舜為不順於
父母如窮困之人無所依歸其怨慕迫切之甚如此夫
天下之士悅之人之所欲舜為天下所歸而不足以解
其憂好色人之所欲妻帝之二女而不足以解憂富而
有財人之所欲舜受堯之禪富有四海而不足以解憂
貴而有爵人之所欲舜踐堯之位貴為天子而不足以
解憂人悅之好色富貴這數件皆極天下之可欲然聖
人視之只如浮雲然舉無足以解憂者惟是以不得乎

親不可以為人不順乎親不可以為子必得順得父母而致其歡悅斯可以解其憂耳孟子推原這幾句說話可謂真知大舜之心者矣是知天下之事有在性分之外者有在性分之内者前面許多所欲之事皆是性分之外的至於父子之親乃是與生俱生不可解於心者常人重外物而輕性分聖人惟只是見得一箇性分在我當盡更不知其他此所以天理人倫之正也為人君者要在此處講求體認真切着實躬行則一善立而百

善從可以通神明可以刑四海治天下亦不難矣宋儒真德秀引之以衍大學之義意益如此

大學衍義四章

上晚年自恃承平以為天下無復可憂遂深居禁中專以聲色自娛悉付政事於林甫林甫媚事左右迎合上意以固其寵杜塞言路掩蔽聰明以成其姦妒賢嫉能排抑勝己以保其位屢起大獄誅逐貴臣以張其勢自皇太子以下畏

之側足凡在相位十九年養成天下之亂而上
不之悟也

真德秀曰此唐舊史論林甫之語也林甫心迹盡於此
矣臣惟小人之志惟在於富貴彼其窺伺迎合先意順
適取悅君心杜塞言路掩蔽聰明而上無以知其姦妒
賢嫉能排抑勝已則人君不見有可用之才而惟已是
用以刑威劫制則人莫敢與抗而可以行其所欲為此
四言者切中小人之情狀其術巧而深周而固苟非剛

明上智之資，豈不墮其計者？自昔姦臣皆莫不然。不特
林甫爾也。夫惟明君夙夜敬德，檢察身心，不敢稍有縱
事，以杜其窺伺之計。而又好賢納諫，明目達聰，長慮遠
顧，使天下之事皆明白洞徹，無有隱伏。則小人蒙蔽之
私自不得行。由是賢才可無遏抑，刑獄可無枉濫，國家
治安職是故也。夫亂不生於亂而生於治，益之告舜，儆
戒無虞。聖帝明王雖當極治之世，視安若危，兢兢業業
以圖。惟治理常恐亂亡在旦夕者，考之玄宗之世，僅號

小康特以在位日久耄荒倦勤心志邪蕩遂偃然以承
平自恃肆情行樂信用姦佞疎遠忠賢冥然昏然置國
事於度外天下之亂已成而不之悟一朝禍作潰敗決
裂幾至喪亡林甫之罪固不可勝誅而玄宗之失君道
亦甚矣豈非後世人主之永鑒哉

安祿山專制三道陰蓄異志殆將十年以上待
之厚欲待上晏駕然後作亂會楊國忠與祿山
不相悅屢言祿山且反上不聽國忠數以事激

之欲其速反以取信於上祿山由是決意遂反
發所部兵十五萬衆以討國忠為名上召宰相
謀之國忠揚揚有德色曰今反者獨祿山耳將
士皆不欲也不過旬日必傳首詣行在上以為
然大臣相顧失色

真德秀曰祿山之所以反者由林甫養成之而國忠激
發之也國忠身為大臣而激賊使反者果何為哉欲人
主信其言之驗而自保寵祿故也蓋姦臣之心苟可以

為己之利者雖危國家覆宗社而不顧吁可畏哉方是時祿山長驅向闕聲震河洛而國忠猶進諂言以惑上聽其志亦以取悅爾而馬嵬之變身首誅分家族殄滅寵祿果可保耶祇足為姦臣之戒而已臣惟所貴乎大臣者為其足以任天下之重事患未至而預為之防禍將發而曲為之備考之唐史言祿山久蓄異志當李林甫之時非不知之特以其嘗屈服於己故容之而莫之發至於國忠其智術既不足以籠絡祿山忤其與已相

抗乃始屢為帝言且數以事激之使速反以取驗此真
德秀所謂林甫養成之國忠激發之其激發之者欲人
主信其言之驗而自保寵祿也臣愚謂祿山之反不係
國忠之激但使為國忠者稍有憂國之誠既知祿山之
謀則必延納英賢分置將帥訓習武事以張皇國威則
明皇雖不即聽其言以疎祿山而吾已陰為之備可以
折其逆謀矣乃徒知之而不思所以處之徒幸其言之
驗為已固寵之利而不知禍之亟為國莫大之害大臣

如是國家亦何所賴其罪可勝誅哉德秀又曰方是時
祿山長驅向闕聲振河洛而國忠猶進諂言以惑上聽
其志亦以取悅耳然馬嵬之變身首誅分家族殄滅寵
祿果可恃邪祇足為姦人之戒夫小人之心極其志慮
始終惟知為已至於國家之大計曾莫之及然其一身
一家之禍亦何足言而敗壞天下生民受其塗炭宗社
幾於滅亡是則可恨惡也

元載在肅宗朝因李輔國薦擢平章事後肅宗

潛誅輔國載預其謀代宗即位載權益甚又以
貨結內侍董秀使主書卓英倩潛與往來上意
所屬載必先知之承意探微意無不合上以是
愈愛之

真德秀曰元載之承意探微即李林甫之善測帝意也
先結輔國後結董秀即李林甫之賂上左右也姦慝相
師不謀而合益如此臣謹按元載以度支郎中擢轉運
使既因李輔國之薦引而致位宰相復以董秀之密授

上意而得以迎合取寵二人皆內侍近幸載雖姦佞智巧使非得二人之助亦未必能爾則人君其可令臣下得與左右近侍私相結納哉然載之術乃李林甫之故智蓋姦佞之人其設心既同則欲行其私須用此術故後之元載即前之林甫唐之林甫即漢之恭顯與夏之寒浞曠代異時同符合節若面相授受者蓋由其設心之同也夫天下事變不常小人之乘間抵隙者何限人主不有以防之則聽納之下豈能一一辯察或因其少

有合意而誤悅之則即已中其姦展轉迷惑而為害日深矣蓋小人罔上之計固巧而深而明君所以御之之術則約而要真德秀所謂虛懷無我虛靜必慾嚴內外杜私謁以一正御衆邪此人君所以防小人者誠不可不加之意也

初楊炎為相惡京兆嚴郢左遷大理卿盧杞欲陷炎引郢為御史大夫先是炎將營家廟有宅在東都憑河南尹趙惠伯賣之惠伯買以為官

解郢按之以為有羨利杞召大理正田晉議法
晉以為律監臨官市買有羨利以乞取論當奪
官杞怒貶晉衡州司馬更召他吏議法以為監
主自盜罪當絞炎廟正直蕭嵩廟地杞因譖炎
曰茲地有王氣玄宗令嵩徙之炎有異志故於
其地建廟炎貶崖州司馬遣中使護送未至縊
殺之惠伯貶都田尉亦殺之

真德秀曰姦臣將盜國柄必以殺僇立威杞惡楊炎既

譖殺之趙惠伯何罪亦殺之蓋不如是無以張已之權而使士大夫懾服之也是時德宗在位未久而杞已得以私意殺大臣異時失國奔播之禍於此可見矣臣謹按書曰天討有罪又曰惟辟作威刑者天之所以誅有罪天子代天理物故得以執其柄然亦必刑當其罪斯可謂之天討故周禮以三刺斷庶獄既訊羣臣又訊羣吏又訊萬民雖尊如人君亦不可得而私也王制凡治獄自下而上末則司寇以成告於王王命三公參聽無

異說王又以三宥議免必不可免而後刑雖以人君之威亦重恤人命而不敢易也天子且然盧杞為人臣乃欲假威權懾服羣心以私意殺大臣如斃狐兔考之唐史楊炎雖有罪然如盧杞所坐則非其實況趙惠伯之死則濫已甚既不聞三刺之議又不聞告成於天子惟其意而莫少顧恤焉則其恣肆可勝言哉當是時諫官不敢發其私怨家不敢白其冤其威權之刼制人心者可見矣德宗初即位正勵精圖治之日而姦臣敢為如

卷七
是由其昏德不聰之故此真德秀謂可以占其異時失
國奔播之禍也

文簡集卷七